



## Nastavak suđenja uhapšenim u akciji Osoje

# SPORAZUM SKLOPIO I JOSIP ČUŽIĆ

**Pored Adisa Burića, i Josip Čužić je odlučio da prizna krivično djelo • Tokom preslušavanja presretnutih telekomunikacija bilo je očito da su optuženi komunicirali u njima poznatim šiframa**

Nakon Adisa Burića, i Josip Čužić je sa Tužilaštvom BiH sklopio sporazum o priznanju krivice, te je protiv njega razdvojen postupak u odnosu na njegove saučesnike uhapšene u akciji Osoje. Tako je u Sudu BiH, pred Sudskim vijećem kojim predsjedava sutkinja Amela Huskić, nastavljeno suđenje Dan-ku Dragoji (koji je umjesto Burića zauzeo mjesto prvooptuženog) i drugima uhapšenim u ovoj akciji, a koji se terete za organizovani kriminal, jer su od aprila do septembra 2013. godine švercovali drogu i to sa području Bosne i Hercegovine u Republiku Hrvatsku.

### Dva puta 50

Nakon što su iz sudnice izašli Čužić i njegova braniteljica Nada Dalipagić, nastavljeno je preslušavanje presretnutih telefonskih razgovora koje je puštao Jasmin Kukavica, pripadnik SIPA. Preslušavani su razgovori meta Osoje 102, Osoje 113, Osoje 133, Osoje 101, Osoje 2112, Osoje 781 i Osoje 782 koji su vođeni u periodu 20. maj, 14. avgust 2013. godine.

Prateći mete Osoje 102 i Osoje 101, pripadnici SIPA su presretali telefonske komunikacije između Semira Habibiće i Denisa Tabakovića. U SMS prepiskama i telefonskim razgovorima oni su se uglavnom dogovarali gdje će ikada piti kafu, te obavljali neodređenu komunikaciju iz koje nije moglo nazrijeti o čemu se radi. Tek u nekoliko navrata prilikom pregledanja presretnutih SMS-ova i preslušavanja presretnutih razgovora između optuženih, poruke i razgovori su imali određenog smisla, ali nije poznato da li se radilo o određenim šiframa koje su koristili optuženi.

Prateći metu Osoje 113, pripadnici SIPA su od 18. maja do 14. avgusta pratili razgovore i prepisku između Adisa Burića, donedavno prvooptuženog u ovom sudskom



Privođenje jednog od optuženih

postupku, i Denisa Tabakovića. Tako je Tabaković 18. maja nazvao Burića i šifrovano ga upitao ga da ga pogura sa dva puta po 50 KM. Kada je Burić odgovorio da "ne konta", Tabaković mu je odgovorio da je "bitan broj dva puta 50", te da će mu napisati poruku i pojasniti. Burić je potom porukom upitao da li Tabakoviću treba "baš dva ili 10" i dobio kratak odgovor - "dva"...

Burić je zatim, ničim izazvan, ubrzo upitao Tabakovića da li je "onaj BMW kompletan 4.000" i dobio potvrđan odgovor. Nakon toga Burić i Tabaković su se u večernjim satima sastali "kod pilota", što se moglo zaključiti iz poruka koje su razmijenili. Narednog dana njih dvojica su razmijenili nekoliko poruka u kojima je Burić rekao Tabakoviću da je "stara bolja", te da se "dobro osjeti", no, nije poznato o čemu se radilo. U večernjim satima Tabaković je Buriću kratko poručio da nešto košta 55 maraka, nakon čega su se vjerovatno sastali. Burić je 8. avgusta Tabakovića upitao putem poruke da mu posudi 1.200 KM i da će mu vratiti, i dobio potvrđan odgovor. U narednoj poruci Burić je pitao kad će se sastati da uzme novac, kako bi nešto mogao naručiti. Nakon tri dana Burić je opet tražio pozajmi-

cu od Tabakovića od 1.000 KM, i dodao da: "ako to nije to, ja više neću raditi ništa".

Prateći metu Osoje 2112 pripadnici SIPA presreli su nekoliko poruka između Tabakovića i Sladana Dragičevića iz kojih se ne može nazrijeti o čemu se radi, osim da Dragičević zove Tabakovića da dođe jer "zove čovjek, a trebao sam i ja" nešto.

### Zapakuj tri i po

Dragičević je 14. avgusta zvao Igora Lečića koji mu je odgovorio da je bolestan i ima groznicu, te dodao da "nije u minusu i da nije skršio robu". Lečić je rekao da "ima para 730", a Tabaković mu je rekao da "zapakuje tri i po". Na Lečićeve molbe Tabaković je pristao da sebi ostavi jednu i po, te da će doći do njega. Potom mu je poručio da snese novac i robu i na njegovu pitanja nestrpljivo mu odbrosio da je dosadan.

Prema optužnici, ova grupa se tereti da je čistili heroin i kokain nabavljala u Sarajevu, Mostaru i Tuzli, a potom po nekoliko stotina grama prebacivala u susjednu državu. Heroin i kokain u Sarajevu, Mostar i Tuzlu stizali su preko Sandžaka iz Turske.

Nastavak suđenja planiran je za 27. avgust. **D. P.**